

1. Odluka o kriterijima za korištenje sredstava za realizaciju Akcionog plana za rješavanje problema Roma iz oblasti stambenog zbrinjavanja

Na osnovu člana 12. Zakona o Ministarstvima i drugim organima uprave Bosne i Hercegovine („Službeni glasnik BiH“, br: 5/03, 42/03, 26/04, 42/04, 45/06, 88/07) i na osnovu člana 16. Zakona o upravi („Službeni glasnik BiH“, br:32/02) i na osnovu čl. 1. i 2. Odluke o rasporedu budžetskih sredstava za rješavanje problema Roma u oblasti zapošljavanja, stambenog zbrinjavanja, zdravstvene zaštite i realizacije programa evidentiranja i uspostave baze podataka o Romima u Bosni i Hercegovini („Službeni glasnik BiH“, br: __/09), ministar za ljudska prava i izbjeglice Bosne i Hercegovine donosi

O D L U K U o kriterijima za korištenje sredstava namijenjenih za rješavanje problema Roma u oblasti stambenog zbrinjavanja

Član 1. (Predmet Odluke)

Sredstva namijenjena za rješavanje problema Roma u oblasti stambenog zbrinjavanja u iznosu od 1.863.000,00 KM, utrošiće se kako slijedi:

a) Za stambeno zbrinjavanje Roma u Federaciji BiH	1.167.000,00 KM
b) Za stambeno zbrinjavanje Roma u Republici Srpskoj	583.000,00 KM
c) Za stambeno zbrinjavanje Roma u Brčko Distriktu BiH	113.000,00 KM

Član 2. (Udruživanje sredstava)

- (1) Sredstva iz člana 1 ove odluke mogu se udruživati sa sredstvima općina, gradova, kantona, entiteta, domaćih i stranih, vladinih i nevladinih organizacija i institucija i drugih domaćih i stranih donatora.
- (2) Način utroška udruženih sredstava urediće se memorandumom o razumijevanju između Ministarstva za ljudska prava i izbjeglice BiH i udružioca iz stava (1) ovog člana.

Član 3. (Namjena sredstava)

- (1) Sredstva iz ove odluke mogu se koristiti isključivo za sljedeće namjene:
 - a) Za izgradnju stanova i kuća,
 - b) Za poboljšanje uslova stanovanja,
 - c) Za sanaciju i urbanizaciju romskih naselja.
- (2) Sredstva iz ove odluke ne mogu se koristiti za pokriće troškova implementacije projekta.

Član 4. (Način realizacije sredstava)

- (1) Sredstva iz ove Odluke realizirat će se putem javnog poziva za prikupljanje projektnih prijedloga za rješavanje problema Roma u oblasti stambenog zbrinjavanja (u daljem tekstu javni poziv).
- (2) Javni poziv iz stava 1 ovog člana objaviće Ministarstvo za ljudska prava i izbjeglice BiH.

Član 5.

(Pravo učešća na javnom pozivu)

Pravo učešća na javnom pozivu imaju općine, gradovi, kantoni, entiteti, domaće i strane, vladine i nevladine organizacije i institucije i drugi domaći i strani donatori u saradnji sa općinom na čijem se području provodi projekat.

Član 6.

(Opći uslovi za učešće na javnom pozivu)

- (1) Opći uslovi za podnošenje projektnih prijedloga su:
 - a) Krajnji korisnici projekata su Romi i romska domaćinstva koja nemaju riješeno stambeno pitanje,
 - b) Uključenost romske populacije(NVO) i centara za socijalni rad u identifikaciju krajnjih korisnika,
 - c) Utvrđeno pravo vlasništva nad stambenom jedinicom koja je predmet projekta,
 - d) Pravo korištenja stambenih jedinica od strane krajnjih korisnika je osigurano na neodređeno vrijeme,
 - e) Ispunjeni su odgovarajući uslovi u skladu sa propisima o građenju.
- (2) Opći uslovi su eliminatorni i obavezujući za sve podnosioc.

Član 7.

(Posebni kriteriji za vrednovanje projektnih prijedloga)

- (1) Posebni kriteriji su elementi za vrednovanje projektnih prijedloga i služe kao osnov za rangiranje prema prioritetima.
- (2) Posebni kriteriji za vrednovanje projektnih prijedloga su naročito:
 - a) Kvalitet i sveobuhvatnost projekta,
 - b) Učešće u sufinansiranju (sredstvima, zemljištu, infrastrukturi i dr.),
 - c) Broj krajnjih korisnika projekta u odnosu na tražena sredstva,
 - d) Racionalnost u planiranju troškova izgradnje (cijena koštanja m² stambenog prostora),
 - e) Doprinos društvenoj uključenosti Roma i razvoju održivih zajednica.

Član 8.

(Komisija za evaluaciju projektnih prijedloga)

- (1) Ministar za ljudska prava i izbjeglice formirat će komisiju za odabir projekata iz oblasti stambenog zbrinjavanja Roma u BiH (u daljem tekstu: komisija).
- (2) U sastav komisije obavezno ulazi predstavnik Roma - član Koordinacionog odbora.

Član 9.

(Način rada Komisije)

- (1) Komisija će utvrditi osnove i izvršiti vrednovanje projektnih prijedloga prema posebnim kriterijima najkasnije u roku od mjesec dana od dana isteka roka za dostavu projektnih prijedloga.

(2) Komisija će o svom radu sačiniti izvještaj sa prijedlogom projekata za finansiranje dostaviti ministru za ljudska prava i izbjeglice BiH.

Član 10.

Za provođenje ove odluke zadužuju se Sektor za ljudska prava i Sektor za opće, pravne i finansijske poslove Ministarstva za ljudska prava i izbjeglice BiH.

Član 11.

Ova odluka stupa na snagu danom donošenja.

MINISTAR

dr. Safet Halilović

Broj:

Datum: